



partii naleraq

9.okt 2019

UKA2019/72

Kalaallit Nunaanni Piartortut najugaqarfissaannik Naalakkersuisut pilersitsinissaq anguniarlugu suliaqarnissamik peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Jens Napātôk', Partii Naleraq)

Inatsisartunut ilaasortaq Jens Napaattoq Partii Naleraq siunnersuuteqarpoq Kalaallit nunaanni Piartortut najugaqarfissaannik Naalakkersuisut pilersitseqqullugit aalajangiiffigisassamik siunnersuuteqarluni tamannalu oqaaseqarfigissavarput.

Partii Naleqqamiit pingaartillugu oqaatigissavarput inuup napparsimalluni piartortup inuunermi naajartornerani paqqutarineqarsinnaaneraniq neqeroorfigineqarsinnaanera taamatumillu pingaartipparput inuunerup naajartulernerani toqqissinartumik ataqqinassusilimmillu parineqarsinnaanera qulakkeertariaqartoq.

Soorunami tamanna tamakkiisumik ilaatigut naammassineqarsinnaanera killeqarsinnaasoq nalunngilarput, pingaartumik nunatta ilaanni periarfissat killeqarsinnaasarmata. Kisiannili ikiuussinnaaffitsigut napparsimasut ikiorserneqarnissaat anguneqarsinnaappat aamma pineqartunut toqqissinanerussamat pingaartumik aamma ilaqutariit eqqarsaatigalugit.

Tassami tamatta ilisimavarput Nunatsinni peqqissaaviit ilusilersorneri eqqarsaatigalugit piartortunut atugassarititaasut paaqqutarinnissamullu killeqarsinnaasartut. Tassami assersuutigalugu taaneqarsinnaapput utoqqaat napparsimasut ilaatigut peqqinnissaqarfimmik nakkutigineqartussat tamatigorluinnangajak utoqqaat illuinut nuunneqartarput peqqinnissaqarfiup tamakkiisumik naammassisinnaangimmagit.

Pissutsit tamakku qanoq pitsaanerulersissinnaavagut inuit nappaammik piartortut eqqarsaatigalugit, qanoq pitsaanagerusumik ikiornissaat angusinaavarput, isumaqarpugut una siunnersuut itigartiinnarnagu nassaarniaqatigiissinnaagaluarugut inuit eqqorneqarsimasut atugaasa pitsaanerulersinnissaannut.

Isumaqarluinnarpugut napparsimasut sapinngisarput tamaat ikiorserneqarnissaat ataatsimoorluta aqutissiunniartariaqaripput inuit naappaammik piartortut qanoq ikiorneqarnissaat maani assortuussutiginaagu qanoq pitsaasumik aqutissiussinnaanerput annertillugu eqqarsaatigiittariaqarpugut, ilisimavarput pissutsit ilaatigt ilungersunarsinnaasut taakkuli uniffiginagit ataatsimiititaliami suliarineqarnissaa assut angorusukkaluarparput.

Nunatsinni ajoraluartumik napparsimalersartut amerlavallaarpugut ilaatigullu aamma napparsimalerutta ikiorneqarsinnaanissarput killeqartorujussuarmik aammalu ilaatigut arrippallaartumik ikiorneqartarluta imaluunniit ikiorserniarneqartaluta.

Nappaat nunatsinni ilaatigut malunnartumik annertusiartuinnartutut malugisartagarput kræftimik napparsimalersarneq ajoraluartumik inuppassuarnik atugaalersimavoq soorunami tamanna toqqissisimananngilaq qanorlu iliuuseqarsinnaanerput nappaammik akiuiniarnermi annertusartariaqalerparput.

Nunatsinni ilaatigut nakorsiarniartarneq ilaatigut pitsaanerpaamik sullissinnaanerup killeqarpallaartarnera nassuerutigisariaqarparput. Amerlavallaat ajoraluartumik napparsimallutik nakorsiarnerminni sukumiisumik misissorneqartannginnerat assut nappaammik eqqorneqarsimasunut ilungersunartorujussuarmik sunniuttarmat ilaatigullu nakorsiartuaraluarlutik pilerinnassavaat ima napparsimatigilersarlutik allaat ikiorneqarsinnaajunnaarsimallutik.

Tamanna inunnt nappaammik eqqorneqarsimasunut assorujussuaq ilungersunassasoq takorloorsinnaavarput pissutsit tamakku napparsimasunut atugassaritinneqartut pitsaanerulersittariaqarput.

Tassami assersuutigalugu nakorsiarniartut illoqarfinni ilaatigut telefuunikkut nakorsiarniarlutik saaffiginnittut takornartaanngilaq nalunaqputaq akunneri ilaatigut marluk utaqqisarlutik tullinngullutik telefuunip tiguneqarnissaanut. Taavalu aamma iluatitsillutik tiguneqarunik nakorsiartarfimmi nalunaqputaq akunneri pingasut sisamat utaqqisarlutik tamanna soorunami ilungersunarpog nakorsiarniartunut ajuippoq pitsanngorsartariaqarlunilu.

Kræftimik napparsimalersartut nunatsinni nunanut avannarlernut sanilliullugit ajoraluartumik qaffasinneroqaat amerlavallaarput eqqorneqartartut. Taava sunaana pissutaasoq taamak amerlatigisunik napparsimalersartut eqqarsaatigalugit. Isumaqrulinnarpugut tamanna misissornerusariaqarippat allaat inuit tamarmik misissorneqartarsinnaanerat eqqarsaatigisariaqalerparput.

Sinerissami napparsimasunik misissuisarneq pitsaanerulissappat taava siornatigut misilittagarineqartut sinerissamat angallammik angalaarlutik misissuisarnerit aallartitariaqaraluartut isumaqrulinnarpugut.

Taamatut oqaaseqarluta neriutigalugu ataatsimoortumik eqqarsaqatiginnissaq angusinnaassallugu inuit napparsimalersimasut kiisalu inuunerup naajartornerani pitsaanersumik ikiussinnaanerput anguniarlugu una siunnersuut innersuupparput ataatsimiititaliami eqqartorneqassasoq.

Hans Enoksen